



S Hieronymus natus est patre Eusebio uiro honesto in Pannonia inferiore, & magnę Germaniæ finibus, in oppido Stridonis, quod tum à Gothis occupatum fuerat. Eo enim tempore Germaniæ limites magis ad Orientem, & minus ad Occidentem extendebantur. Nam postea cum Germani Rhenum transcenderent, et Galliam inuaderēt, Vngari Orientalem Germaniam occuparunt. In eo loco à parentibus pijs diligenter institutus, unà cum Bonoso inter ipsos statim parentum amplexus & nutricum blanditias Christum imbibit: ac mox Christianæ pietatis rudimentis imbutus, simulq; bonis literis, quarum ea ætas tum capax esse poterat. puer adhuc Romam missus est, uelut ad primariam eo seculo tū religionis tum eruditionis magistram, liberalibus studijs erudiendus, quod ipse super ii. caput Ezech. declarat. Præceptores ibi habuit eximios, Donatum in Grammaticis, & Victorinum in Rhetoricis. sub huiusmodi uiris in bonis literis iam adultior nullum doctrinæ genus intactum reliquit. Porphyrij Isagogen, Aristotelicam, Platonicā, & cæterorum omnium philosophiam attigit. Historijs etiam & Mathematicis operā dedit. partim quod intelligeret apud Latinos ad id temporis usque Theologiam penè infantem esse, & ob hanc causam permultos à diuinorum uoluminum lectione abhorrere, sperās futurum ut plures sacris literis delectarētur, si quis Theologiæ maiestatem dignitate sermonis æquasset: partim ut esset aliquādo quod ethnicis obijci posset, Christianos ut infantes & elingues despiciētibus. Studiorum sodales habuit Pammachium, Bonosum, & Heliodorum. Itaq; Romanę urbi multū debuit, præsertim cum etiam ibidem baptizatus candidam Christi uestem, symbolū innocentię accepisset. Cum autem eo tempore celeberrima quoq; Christianorum schola Treuiris in finibus Galliæ & Germaniæ esset, ipse sese eò contulit, & cum Ruffino & Florentio (ut Auentinus dicit) gnauiter studijs incubuit. Ibidem etiā ingens Hilarij uolumen de synodis suapte manu descripsit, & magnam literarum notitiam nactus fuit. Postea secūdum Danubium per Germaniam descendens utranque patriam reuisit, eam scilicet in qua natus, et eam in qua baptizatus fuerat.